

四庫全書

經部

欽定四庫全書

經部

四書管窺卷八

詳校官給事中臣丁雲錦

刑部郎中臣許兆椿覆勘

總校官進士臣朱 鈐

校對官編修臣邱庭澐

謄錄監生臣慕湘文

欽定四庫全書

四書管窺卷八

元 史伯璿 撰

中庸

二十二章至誠盡性 饒氏曰此與首章一般至誠便是致中和贊化育便是天地位萬物育 輯釋亦引之此只因以致中和之致為坐致之致故如此說其實致中和之致與致曲之致何異前辯已明此不再述

集成或疑此章以後天道人道間見迭出永嘉陳氏曰道理縱橫說之無盡如何立定樣子只合逐章體認才不費力處便是天道着力處便是人道

或者之疑亦有理陳氏所答雖善而終未瑩徹恐必有說當於第二十六章章下求之但陳氏之說却可以破饒氏大哉聖人之道以下六章不說天道人道之誤可謂有功於章句矣

第二十三章致曲 輯講問章句曲一偏也就一偏推

致如何得有誠饒氏謂子思之意如舉隅絜矩相似隅有四角矩有四方曲有四面曲字已有四偏形如惻隱羞惡辭讓是非四者各是一偏自此一一推致則便可  
以會德之全

按章句既曰曲一偏也又曰自其善端發見之偏而悉推致之以各造其極也蓋人之氣質不同德性之發見有厚薄發見之厚處便是一偏之曲致者推而極之之謂謂以此一偏發見之厚處而推其餘悉使

之一一如此一偏之厚所謂各造其極也問者疑就  
一偏推致如何得有誠蓋以章句為但就一偏推致  
而不察章句自字悉字各字極字之意也若達則豈  
宜有此問哉雙峰之答固是但曰子思之意 云云 則  
隱然似乎以章句為未盡者蓋若以所言發明章句  
則當提起章句無病之實以釋問者之疑今既不然  
則是亦不知已意不出章句意也讀者詳之

饒氏又謂自篇首便見喜怒哀樂四件喜仁怒義樂禮

哀知云云

先儒謂七情不可分配四端又謂七情於四端處橫貫過推此則饒說似有可疑況喜仁怒義樂禮三者猶有意思哀知一說殊所未喻

第二十五章誠自成道自道章句曰言誠者物之所以自成而道者人之所當行也誠以心言本也道以理言用也

為子而實能孝其親便是成就自家做个孝子云云又

謂誠即道也似不可分本與用

誠者自成是自然成就底道理未說 人力上下句  
道自道方是當着力處語錄說此意極分曉雙峰為  
子實能孝之說能字下得早了是把自然道理作人  
力說所以於下句當用力處意便重疊說去不得遂  
以為誠即是道不可分本與用言之以此見章句之  
未易看亦未易病也

饒氏又謂誠者物之終始不誠無物此兩句是解誠者



自成之義是故君子誠之為貴是解道自道一句之意  
語錄有兩說一以不誠無物屬上句一以不誠無物  
屬下句其屬上句之說往往章句未定時所言其屬  
下句之意蓋曰不是誰不他蓋人則有不誠而理則  
無不誠者故此下句已是說道自道了雙峰因看上  
節誠字為人力故看此不字亦不出而謂不誠無物  
為解誠者自成殊不知此蓋朱子未定之意也讀者  
詳之

輯講問章句又曰誠以心言本也道以理言用也竊疑上是實心下是實理看來都是體如何分體用饒氏曰真个可疑此章頗難看章句反為所纏蓋誠即道也非是兩般如誠者天之道是也

按通云誠自成也誠即是天命之性道自道上一道字是率性之道誠以心言本也道以理言用也專為人之所當自行者而言如此分別儘佳愚往年每與同志說如此後來四書通板行其說果與管見有契

達此則饒氏師弟子之疑可氷釋矣或者猶因雙峰之疑而疵章句曰誠者自成章句既以為兼人物而言則草木禽獸皆不外乎此矣又曰誠以心言然則草木亦有心耶是又不詳章句之旨而妄肆般疵者也蓋亦觀於章句上曰誠者物之所以自成下曰道者人之所當自行上曰物而下曰人意便可見然則下文心字又豈指物而言哉不過指人之所當自行者之心而可耳請因通者之意而申之夫性是本道

是用性是本然之實理自人言之則舍心無以見性  
故朱子直以心言此節誠自成一句固兼人物而言  
似不可專指心說然道自道一句便是專指人說了  
觀章句下句變物言人之意可見人則能自行其道  
物豈可以行道責之觀於下節君子誠之之意又可  
見朱子此節章句凡四句上二句只順經文解盡經  
旨下二句却專為指示學者設則其專為人之所當  
自行者言尚何疑乎章句之意正以見誠就人分上

說是以心言心主於一身故為本道以理言理散於萬事如君臣之義父子之親皆是故為用變誠言心有二意一則心有覺而道無為心所以為行道之本一則行道惟人為能故以心為在人之誠亦猶首章章句舊本不言性之所以為性而言人之所以為人之意皆是自此以後專為學者言之也知彼則知此矣朱子嘗曰心雖主乎一身而其體之虛靈足以管乎天下之理理雖散在事物而其用之微妙實不外

乎一人之心盖理具於心而散在事物心主乎身而  
管攝衆理問者謂實理實心看來都是體者盖但就  
心主乎身理具於心處言殊不思理具於心者又只  
是性可以言誠不可以言道朱子謂誠以心言此就  
管攝衆理處說心道以理言是就散在事物處說理  
就管攝衆理處說心故曰本就散在事物處說理故  
曰用問者但知具於心者之為理而不知散在事物  
者之乃所以為理故如此疑耳雙峰所見正與問者

有契故曰誠即道也非有兩般如誠者天之道是也  
蓋皆不達子思朱子之意而致誤耳其以誠者天之  
道為證後段辨之且饒氏謂此章頗難看則是矣謂  
章句反為所纏則非也特饒氏自為所纏耳

發明謂道即誠之道也如云誠者天之道至誠之道自  
其真實無妄言之則曰誠自其天下通行言之則曰道  
一而已矣

此其勸饒說以為已意其迹甚顯但誠者天道至誠

之道只是一句此以誠與道相對言之分明是一本一用而以彼為證可乎以此觀之發明之不及通達甚輯釋引通而不取發明宜矣

成已成物 發明引陳氏曰異端但知成已不知成物吾儒以成物為成異端以空寂為成彼之成已自我觀之見其自壞而已天下豈有真能成已而不知成物者耶

發明愚嘗深繹此章誠本自成已也誠之為道內自道



於已也此為已之學也天命之性具此實理誠者實此者也實有諸已故曰自成率性之道躬自行之道者行此者也躬行於已故曰自道 輯釋亦引之

按誠者自成是理之自然未說到人力上發明實此者也實有諸已之言則未免有攙說人力之病蓋未達誠自成只是物物各具一太極之實理而已之意也唯其所見如此故於雙峰之說每惓惓而不能捨也已於辨饒說處及之其曰率性之道躬自行之亦

似未當躬自行之亦非所以言率也其曰誠之為道  
云者此則饒氏誠者天道之意爾前辨已明此不再  
述

第二十六章故至誠無息 饒氏謂人之誠有至有不  
至聖人誠之至故可以說至誠若天地只是誠更無至  
不至 輯釋亦引之

按論語集註一貫章有曰譬則天地之至誠無息則  
似不必拘也但此處言聖人配天地之意則是說聖

人而非指天地爾

輯講問悠久悠遠有以異乎饒氏謂無以異也不息則  
久云云博厚則高明此推其無息之效故其序如此下  
一截指其成德而言故先博厚高明而後悠久 輯釋  
亦引此說

按章句於微則悠遠以下以為皆以其驗於外者言  
之於悠久成物處云悠久即悠遠兼內外而言之也  
猶宜亦有斟酌饒氏直以為無以異則言之太快而

不免有所遺矣至謂下一截指其成德而言則尤恐未當蓋至誠已是成德事了下文但言其常於中而驗於外者如此耳非如此而後德始成也雙峰乃曰下一截指成德而言然則上一截非成德之事耶此則所未喻者餘於後二段究之

輯講問不息則久與悠久兩個久字似無異義而朱子以久為內以悠久為兼內外是如何饒氏曰上面久字是在內下面悠久是指外面

前段悠久悠遠無異之言

病根在此  
輯釋亦引之

按問者兩久字似無異義之疑是矣而謂朱子以悠  
久為兼內外異乎上文以久為內之旨則未悉章句  
之旨者也為雙峰者宜告之曰悠久之悠即悠遠之  
悠此指驗於外者言也悠久之久即久則徵之久此  
指常於中者言也兼內外者外主悠言內主久言爾  
如此則兩久字皆在內章句無可疑矣今不以此告  
之而曰上久字是在內下悠久是外面底則二久字

果有不同矣不惟不足以釋問者之疑又且勇於背  
章句之旨亦獨何哉蓋朱子皆以久為在內者其意  
若曰唯其常於中故驗於外者悠遠而博厚高明惟  
博厚高明故又如此之悠久悠久則驗於外者又未  
嘗不常於中也首尾相應如此況同一久字不應頓  
有內外之異若以久亦可以言外耶則上文久與悠  
遠分內與外又何為而不易耶以此見朱子之精密  
似非雙峰所及

輯講問章句云天地山川實非由積累而後大看來及其二字似解不去饒氏曰子思大意只是形容不息之義云云以此見得人之德固以誠為貴然非不息則亦不能博厚高明與天地同其功用須是無息始得前段  
下截指其成德而言之說病根在此

至誠則自然無息無息則自然常於中驗於外而與天地同其體用非至誠之後猶有待於不息而後能與天地同其功用也或問力辨諸家之失皆為其如

此讀者攷焉可也雙峰以此見人之德固以誠為貴  
至須是無息始得一段議論皆似以為至誠之後又  
須使之無息始得然者此則誠所未喻也章句曰既  
無虛假自無間斷自之一字豈非預為雙峰對證之  
樂耶讀者其詳味之

章句

云云

然天地山川實非積累而後大讀者不以辭

害意可也

叢說帝堯自明德後以至於黎民於變時

雍豈無次第之序孔子自志學至不踰矩豈無造詣之



極則子思四及字之意豈亦無意

按章句上文曰此四條皆發明由其不貳不息以致盛大而能生物之意此曰然天地山川實非由積累而後大讀者不以辭害意可也兩意字正相應蓋至誠之德固無積累之漸然其及物之功則未嘗不自近而及遠自小而至大也故以天地山川積盛而能生物者為喻其意只欲以此發明由其不貳不息以致盛大而能生物之義其辭則似乎天地山川由積

累而後大者而實則非有此事也故章句曰然天地山川實非由積累而後大讀者不以辭害意可也輯讀及其二字似解不去之疑與叢說四及字豈亦無意之語皆是以辭害意不達至誠之德無積累之漸而成物之功則有積累之漸者而又泥於辭不知天地山川實非積累而後大遂謂至誠之德亦有積累之漸者皆不可不察且叢說以堯為證堯之克明峻德其亦異乎自格致誠正以修其身者之明明德矣

固未可以此一言為至誠亦有漸次之證也若夫親九族至協和萬邦以下自是及物之功章句何嘗亦以此為無漸次哉觀其所言由其不貳不息以致盛大而能生物致之一字則及物之功為有漸次可知至於孔子所言自是下學之次第聖人特因其近似者以自名為學者之法程耳遽以近似之言為至誠真有漸次之證毋乃於夫子子思之意兩失之歟叢說此意正是蹈襲雙峰下截指其成德而言與須是

金  
卷八  
不息始得之言以為說饒說愚已辨之於前矣但雙峰說天道不成天道不成人道何則天道有效驗無工夫雙峰則以為須是無息始得是猶有待於用力而後不息也非天道不成天道乎人道必先知後仁雙峰於致曲以後說人道處皆說為先仁後知非人道不成人道乎叢說不辯其失而效其尤尚可自謂得朱子之傳乎噫甚矣雙峰之說易惑人也豈特叢說為然

自至誠盡性章至至誠無息章五章 饒氏謂至誠盡性章以誠者之仁而言致曲章以誠之者之仁而言至誠前知章以誠者之知而言誠自成章以誠之者之知而言至誠無息章以誠者之勇而言或問前章誠者之仁知即繼以誠之者之仁知至誠無息章論誠者之勇而不復以誠之者之勇言之何也饒氏曰誠者不勉而仁不思而知若無以見其勇者故特以悠久不息著其勇若夫誠之者則非勉無以仁非思無以知而所謂勇

者已存於思勉之中而不復別以勇言也況誠之之工至此則人道已盡而其至誠無息固將與天道為一所謂誠則明明則誠也又豈可以差等言哉又以此數章皆先仁後知而勇以終之成德之序然也

按此說似乎與章句不同然詳味之似亦不為無理何則此五章以天道人道相同而言若無說以貫之則似乎雜亂無統紀者觀於篇首言不明不行之意以下諸章所論三達德相承之次秩然如彼其有條

也豈容於此處乃無一說以貫之耶愚竊以雙峰配此五章為三達德不為無理而此五章皆是以三達德發明天道人道之義與章句之意自不相妨却又得相承之次有條不紊不為無功於章句也但其為說猶有未透徹處則不可不為之發明耳夫誠者之三達德固以先仁後知為序致曲之仁亦先成物之知何歟此特承上章天道遂言人道以為進道之階梯固非以此亦為先仁後知之序而亦不容改為之

序也尚何疑乎或又疑盡性之盡致曲之致似不可專主行而為仁也曰章句釋誠明之義以德無不實為誠以明無不照為明誠即仁明即知也盡性雖兼察之由之而言其實只是德無不實之事故但當為誠者之仁致曲之上既以其次二字發之章末又以至誠能化終之止是承上章言學者由教而入以上同乎聖人盡性之事則亦但當承上章為誠之者之仁耳前知章正是明無不照之事以為誠者之知固



無可疑獨誠自成章為誠之者之知乃不承上章前  
知如神之意而言而別取成物之義似與致曲承盡  
性而言者不類為可疑耳蓋誠明明誠二誠字雖有  
淺深然其皆為德實於己之意則亦初無甚異故誠  
之者之仁可以承誠者之仁而言二明字則一在誠  
前為入德工夫先明乎善之明也一在誠後為至誠  
之效驗明無不照之明也義全不同若以欲以誠之  
者之知承前知如神之明而言則又只說得誠明之

明而不得為明誠之明豈得為誠之者之知哉故不  
取明意但主成物言之既可少異於入德明善之工  
又不害其為學者致用之事其旨深矣或猶以為誠  
自成一章僅有成物知也一句又對成已仁也一句  
而言何以見得是誠之者之知曰中庸諸章言仁者  
未嘗截然不及知意言知者未嘗截然不及仁意顧  
其所主如何耳此章自君子誠之為貴以上雖未及  
成物正是先言此以為成物之本亦猶大學新民章

先說自新以為新民之本者相似自此以下却全是說歸成物上去其曰非自成已而已也所以成物也觀非自字而已也字所以字抑揚之意蓋可見矣下文成已仁也成物知也性之德也合外內之道也四句雖以仁知對言却正是恐人以成已為內成物為外則將但知成已而不知成物故以仁知對舉以見其皆為性之德不可判內外為二致而不復以成物為事也成物可以外言知可以外言乎此仁知之所

以合外內之道也內是成己外是成物所以合外內之道是仁知正以仁知皆性之德故耳詳此文勢全是解常人分內外輕成物之惑而專歸重於知者故結之曰故時措之宜也時措之宜正是知用萬物道濟天下也事全是說成物之知分曉所以章句曰既得於己則見於事者以時措之而皆得其宜也饒氏亦曰時措之宜是專說成物由是而觀則此五章皆是說三達德如雙峰之說無可疑矣餘於後段究之

饒氏以哀公問政章以下至至誠無息章八章為第四大節皆主誠而言而分三達德以配之

雙峰折二十章

為二章故曰八章

又以自大哉聖人之道以下六章為

第五大節皆言大德小德非對上文為天道人道之分也

按中庸一篇朱子分為三十三章總為五大節饒氏變章句之序分哀公問政章為兩章故有三十四章而總為六大節首節次節末節皆與章句無異惟析

章句第三第四節兩節為三節為不同耳其析哀公問政章為兩章與併以之屬下章之失已於前章及孟子離婁上篇辯之此不再述其以盡性至無息五章分配三達德則似不為無理已於前段明之但以諸章自為一節分大哉聖人之道以下六章亦自為一節二節前後不相貫通後節非有天道人道之分又謂自誠明章至經綸章皆以先仁後知為序則皆未必然耳蓋就此十二章中指盡性至無息五章分

配三達德則可而欲分十二章為兩節則不可其實  
十二章皆言天道人道共作一大節本無可議只因  
雙峰分配三達德至無息章議論已盡故只得如此  
分節耳其得失當續論之但此十二章前六章言天  
道人道以一章間一章為次先天道而後人道後六  
章言天道人道以三章間三章為次先人道而後天  
道則不容無少分別如此則一大節之中不妨前後  
自含兩意耳故愚既辨雙峰之失復取其是而補其

缺僭為臆說如左以俟有道而就正焉其謂十二章皆以先仁後知為序之誤後段及下章辯之

愚妄謂此十二章除誠明章統說起外自盡性以下五章此是申言三達德以發天道人道之義也自大哉聖人之道以下六章此是申言費隱以發明天道人道之義也其以前五章為申言三達德以發明天道人道之說此則雙峰之所已言愚既於前段詳之矣此不再述其以後六章為申言費



隱以發明天道人道之義何以知其然耶曰此亦  
因章句之意而推之爾章句以發育峻極為極於  
至大而無外以三千三百為入於至小而無間以  
存心為極乎道體之大以致知為盡乎道體之細  
所謂大小非即費之大小乎下二章皆承此章言  
之前章承為下不倍言則亦語小之意後章承居  
上不驕言則亦語大之意雙峰有此說則亦莫非  
費之大小而已然此皆言費而隱在其中亦猶前

章之意爾繼此則仲尼祖述章發出小德川流大

德敦化之意小德大德非隱乎川流敦化則費矣

川流即三千三百之意敦化即發育峻極之意其下二章又承此章而言

前章承小德川流而言即費意後章承大德敦化

而言即隱意

小德川流大德敦化經文就天地分上言則交互分體用下二章只就聖

人分上言故又如此分費亦不過皆斯道之體用  
隱餘於下章及篇末詳之

耳其詳於下章言之愚故以此十二章為申言三

達德費隱以發明天道人道之義也至若此十二

章中前五章先天道而後人道者是欲學者先知天道以為造道之準的然後由人道以求至乎其極耳後六章先人道而後天道者是又欲學者先得人道以為進道之階梯然後可以盡乎天道之極至耳前五章言天道人道以一章間一章為序者因三達德而分也後六章言天道人道以三章間三章為序者因費隱大小而分也不過皆是反覆發明天道人道之義而已而天道人道又不過

皆所以發明中庸也抑愚又嘗因此一節十二章之旨以推前二節十九章之義則似乎有相同者何則中庸除首末二章始之終之外中間分三大節前十章是一節言中庸次九章是一節言費隱愚嘗合而觀之是自三達德說入費隱上去其實皆所以明中庸之義也後十二章是一節皆言天道人道愚嘗析而辨之亦是自三達德說入費隱上去其實亦所以明中庸之義也三達德與費隱

前則析為二節而詳言之後則合為一節而統言之是後一節之中却該前二節所言之意也前二節則主於立本用工以立其本故但言三達德與費隱以發明中庸後一節則主於致用成功而致其用故分別天道人道以發明中庸其實天道人道亦但於達德費隱上見之此其大畧也其詳論之如左

一何以見得三節皆發明中庸

二何為前後皆自知仁勇說入費隱上去

三三達德與費隱何故前析為二節而言後  
統為一節而言

四何故天道人道亦但於達德費隱上見  
五何以見得前二節主於立本後一節主於  
致用

六中庸知仁勇費隱天道人道名目不同何  
以貫而通之

一第二節言中庸此章句成說無可疑者第三節

章句以為言費隱第四節章句以為言天道人道今皆以為發明中庸何也曰自第二章以下十章章句以為皆論中庸以釋首章之義費隱章章句亦以為申明首章道不可離之意下八章又皆以明此章之義者然則亦承第二節以發明中庸可知矣况下章即言庸德之行舜大孝章章句又以為此由庸行之常推之以極其至後二章亦此意然則此九章皆為以費隱大

小發明中庸又可知矣以此二節言三達德費  
隱為皆發明中庸之意推之則誠明以下十二  
章言天道人道處不過亦是申言三達德費隱  
而已又何獨不得為發明中庸之意耶大抵三  
達德與費隱不外乎中庸而天道人道又不外  
乎達德費隱然則又豈中庸之外他有一天道  
道之分哉則其皆為發明中庸之義尚何疑乎  
二知仁勇是德費隱是道其理雖無二致然德則



存於夫人之心道則散在天下之事德是人所能知能行之器具道是人所當知當行之材料德譬如匠者之有繩墨斧斤一般道譬如匠者之有榱桷豫章一般以此德而知行此道譬如匠者施繩墨斧斤於榱桷豫章以為宮室舟車一般所以前後皆自知仁勇說入費隱上去者蓋必先有能知能行之器具然後可以施之於當知當行之材料也今以前後所言推之則自

第二章以下十章論三達德處皆反覆言擇守  
知行之義蓋先以人所能知能行者言也直至  
第十二章說君子之道費而隱其下即以夫婦  
之所與知與能聖人之所不知不能與天地猶  
有憾者繼之此所謂知即達德知所能知之知  
此所謂行即達德仁所能行之行爾以見斯道  
之用自一事以極乎全體皆夫人之所當知當  
行者也故其下章或言費之大或言費之小大

小雖不同皆不過是全體中所該何莫非人所  
當知當行者乎末後二十章所以終十二章之  
義者又彰彰然以達德所以行乎達道者言於  
章中其意尤為易見自二十一章以下論三達  
德處亦皆反覆分別誠明明誠難易淺深之不  
同蓋亦先以聖人學者所能行能知者言也直  
至二十七章說大哉聖人之道其下即以道體  
之大無外小無間者繼之此即申言費隱之義

所謂大小即費之大小耳然後言尊德性道問學以下五句為學者修德凝道之方其事不外乎知行兩端而已德性即知仁所以為知行之體者問學即知行所以為知仁之用也以見道之全體皆夫人所當知當行者也故其下二章反覆乎不驕不倍之義又何莫非全體中之事亦行道者所當知爾知行之至必如仲尼祖述章取譬之意與下二章所謂至誠非至聖不能

知至聖非至誠不能為之意而後於道之全體  
無所遺耳然則前後皆自知仁勇說入費隱上  
去者於此不難見矣

三三達德與費隱是道理之名目天道人道是聖  
賢之等級前欲指道理之名目以示人故不容  
不分達德與費隱為二節而詳言之後欲明聖  
賢之等級以示人故不容不致意於天道人道  
之分別若達德費隱之旨則已於前二節詳之

此但申言其理以顯天道人道之同異處爾政  
不必再分達德與費隱為二節但為一節主於  
分別天道人道而於一節之中自該前兩節之  
意足矣尚何疑乎

四道理之名目其義實聖賢之等級其義虛將欲  
明天道人道之同異以示人而不就達德費隱  
上言之則義之虛者懸空無所着落其不陷於  
老莊之窈冥昏默者幾希故必就達德費隱上

分別出天道人道之同異然後義之虛者於義之實上見而聖賢之品級明矣

五中間三大節前二節主於立本後一節主於致用大抵中庸一書專為開來學而設故於學者立本致用之意為詳其說聖人事與至誠之功用亦不過皆為學者立本致用之準的而已若聖人則又何假於言哉唯前二節主於立本故於入德之工夫為詳而於聖人之事為畧其發

明中庸所以致詳於三達德費隱之義者蓋以學者立本之要非三達德無以為入道之門非費隱無以見道不可離之意也惟後一節主於致用故於成德之效驗為詳而於下學之事為畧其發明中庸所以反覆乎天道人道之同異者蓋以聖人之功用學者之致用有難易淺深之不同也前二節亦有言聖人之事處如依乎中庸邈世不見知而不悔舜大孝文無憂武王



周公達孝議者天之道不勉不思從容中道之類不過數處不過皆愚所謂以為學者立本之準的而已者也自此之外則皆學者入德之工夫也何莫非主於立本而言乎後一節亦有言下學之事處如明誠致的道自道尊德性道問學至敦厚崇禮之類亦不過數處然皆不過是言此以引起致用之意故致曲自形著動變以下道自道自成已成物以下尊德性自居上不

驕以下以盡乎二章之旨亦皆以致用之效驗

與致用之當否而言也

愚自用章三重章皆以致用之當否而言故為

人道若是天道則發見當其可有當而無否矣

其餘說天道處則皆全

是聖人之功用亦不過皆愚所謂以為學者致

用之準的者也何莫非主於致用而言乎是以

前後所言三達德費隱之義推之尤為易見前

二節惟主於立本故其論三達德處於學者事

則言知

擇中庸

言仁

守中庸

而又言勇

強中庸

以見學者非勇則無以至於知之成功而一也

於聖人事則但言知

知之盡

言仁

仁之至

而又

言勇

不賴勇而裕如

以見聖人雖未嘗無勇然

不賴勇而裕如也其論費隱大小處則以君子

之道發其端道雖即是聖人之道而君子則為

學者期之也非愚所謂於入德之工夫為詳於

聖人之事為畧之意乎後一節唯主於致用故

其論達德處於聖人之事則言仁

盡性

言知前

知而又言勇無息以見聖人雖無所賴乎勇而

亦未嘗無勇也於學者事則但言仁致曲言知

成物

而不言勇以見學問之極功即是聖神之

能事

至誠能化時措之宜皆是自學者至聖人處

其勇亦統於至誠

無息之中矣其論大小費隱處則以聖人之道

發其端道雖無異於君子之道然聖人則非學

者所可稱也非愚所謂於成德之效驗為詳於

下學之事為畧之意乎所以前二節中雖有聖

人之事亦是為學者之法不過主於立本皆以人道言之故但當以先知後仁為序也後一節則分天道人道而言其說天道處則是自誠而明固當以先仁後知為序其說人道處則依舊是學者事雖則主於致用既是自明而誠由教而入只當以先知後仁為序耳饒氏乃謂自誠明章後皆以先仁後知為序強說尊德性而道問學亦為先仁後知之事則泥而不通矣其誤

於下章辯之唯二十章介在立本致用之間故其說最為詳備所以知仁勇天道人道之言皆於此章說出以此見得此章正是承前啟後所  
在也或者猶疑舜大知聖人事也而亦統於學者立本之事可乎曰舜雖聖人好問用中則學者入德之法也尚何疑乎

六中庸之與達德費隱非有二也知所以知此中庸仁所以行此中庸勇所以強此中庸者也費

即中庸之用隱即中庸之體也中庸即知所知  
仁所行勇所強體之隱用之費不偏不倚無過  
不及而平常者也中庸之與天道人道亦豈有  
二哉天道特自然盡此中庸人道特用力求盡  
此中庸者也達德費隱之與天道人道非有二  
也天道之於達德性焉安焉者也故其於費隱  
之體用自然與之一矣人道之於達德復焉執  
焉者也故其於費隱之體用始猶與之為二終

乃與之為一矣又細分之則三達德與費隱亦豈有三乎哉三達德之具於性者體也非即體之隱者乎三達德之見於事者用也非即用之費者乎如此則中庸一書似覺首尾貫通義理明白管見如此夫敢自信姑筆於此以俟有道而取正云

第二十七章饒氏以自此以下六章為第五大節說大德小德又以致廣大等為充其大德盡精微等為充其



小德

以六章自為一節其得失已辯於前矣雙峰此意似以發育峻極極於至大而無外者即為大德以三千三百入於至小而無間者即為小德愚竊以為得之而未盡請以管見陳之於左以俟明者之折衷焉

竊意此二節

洋洋優優

且就敦化川流上說皆是

說費未說到隱處若小德大德則為隱矣雙峰克大德小德之說所謂小德大德似指費說與經文

大德小德之旨不類似未可牽合以為說也夫發

育峻極便是敦化處

發育即化意  
峻極即敦意

三千三百便是

川流意

此於川流  
意自易見

皆只言費之大小雖費中有隱

然未說出以示人也下文自尊德性道問學以盡

乎二下章所言皆是但言費而隱在其中直至仲

尼祖述章方說出小德川流大德敦化二句小德

大德正是隱川流敦化則費矣或疑大德為萬殊

之本以為言隱可也小德為全體之分亦以為隱

可乎曰萬殊之本即萬物全體一太極全體之分  
即物物各具一太極耳太極不離乎陰陽而亦不  
雜乎陰陽萬物統體處與物物各具處皆如此不  
離乎陰陽者即費也川流敦化是已不雜乎陰陽  
者非隱乎舍大德小德將何以當之蓋費有大小  
大處小處皆有隱大處之隱非即敦化者之大德  
乎小處之隱非即川流者之小德乎若但以大德  
為隱小德不為隱則是費之大處有隱費之小處

却無隱也造化本原上有隱事物各具上却無隱也而可乎蓋亦以天道流行人性感通之理而驗之乎蓋以天道對人性言之則天道即是全體處所謂萬殊之本也非大德而何人性即是萬殊處所謂全體之分也非小德而何然天道之流行處便是敦化之意固費也人性之感通處便是川流之意亦費也天道之沖漠無朕處固是費中之隱即大德是已人性之寂然不動處亦豈非費中之

隱乎不謂之小德不可也以此推之則費隱之義  
尤為易見或又疑小德為全體之分大德為萬殊  
之本正與一貫忠恕章集註以萬殊所以一本為  
體一本所以萬殊為用者相類今以小德大德皆  
為隱則全體之分亦當為體而不為用與言一本  
所以萬殊為用之意不合豈朱子意耶曰一貫費  
隱皆是以一體對一用言易曉惟此章分體用則  
當以二句相對見一本萬殊之義又以每句分作

兩截見費隱之義而不可偏主也難曉所以然者  
盖一以貫之是就聖人分上言小德川流大德敦  
化是就天地分上言費隱則無間乎聖人天地皆  
可言也就聖人分上言不過只是小德川流一脚  
事故但以一體一用相對言之足矣就天地分上  
言則包人物於其中是故以屬之天地者對屬之  
人物者言則以屬之天地者為體屬之人物者為  
用此一本萬殊之正義也然屬之天地者亦自有

體有用屬之人物者亦自有體有用用皆可以費  
言體皆可以隱言也然則子思小德川流大德敦  
化二句正是言天地之道以明聖人之道耳者只  
就聖人之道言之所謂一以貫之其實亦只是全  
得个全體之分者以為體之一全得个如川之流  
者以為用之貫有似於天地之化一本而萬殊者  
耳非不過只是小德川流一脚事而何觀朱子於  
一貫章亦曰譬則天地之至誠無息而萬物各得

其所也朱子所謂譬則子思所謂譬如皆只謂聖人之道與天地之道相似而已何嘗以屬之聖人者即為屬之天地者哉然則此與一貫章集註亦無所謂背矣勉齋雙峰正如此交互分體用當於後段及之更以章句析小德大德川流敦化為四節而解之之意推之亦自可見朱子雖未如此分析然如此分析亦於經註之旨無所謂悖不知明者以為然否



尊德性至崇禮輯講此五句上一句為綱下四句為目乃修德凝道之方也欲修是德必先尊德性以為之本既尊德性又必由問學之功以充其大小之德致廣大至崇禮八者道問學之目也

此說與章句不同蓋由不達章句存心之義而以力行當之故致誤耳後段辯之

輯講致廣大以行言盡精微以知言極高明以知言道中庸以行言溫故知新皆以知言敦厚崇禮皆以行言

同上 問章句分存心致知之屬竊謂致廣大敦厚固屬存心盡精微知新固屬致知若以極高明溫故屬存心道中庸崇禮屬致知恐未安講義之分知行似為親切饒氏曰如此似乎無病

如此分知行與章句異雖似可通然章句以存心對致知而言饒氏以行對知而言此則似是而非大有可辯蓋存心是心上主敬工夫行是身上踐履工夫存心是且存其本然之理力行則為其事矣存心是

該貫動靜工夫

動時存心方能省察

所以為知行之

本行則全是動時工夫又是存心致知以後事行事  
時循理而不徇欲非存心有素者不能然不可不精  
別遂謂力行為存心也四書通謂讀者因陳氏謂存  
心是力行工夫遂疑高明溫故屬知此言可謂切中  
雙峰致誤之由矣殊不知泛而言之謂存心屬行猶  
言省察屬知者相似若未甚害若細分之則存心與  
行實不同雖知行皆不可不存心但此章章句以存

心居致知之前則是以存心為致知之本也觀朱子於大學或問引尊德性而道問學為主敬以格物致知之證而此章語錄又引程子存養須用敬進學則在致知之言為證則可見矣雙峰只因誤認存心為行故疑高明溫故之不可為行又因此疑行之事不當只有致廣大敦厚二者遂併意下節道中庸崇禮之亦為行而非致知故如此分知行耳愚請先辯雙峰之誤然後發明章句之旨以究之夫雙峰之意豈

不以高明有知之意知主於知極其高明非知而何  
故者舊所聞亦知之意溫故又非知而何殊不思高  
明與廣大皆吾心本然之體段非由外鑠我也但為  
私意所蔽私欲所累則失之耳致之極之非著力求  
之於外而得也但不以私意自蔽則為有以致其廣  
大不以私欲自累則為有以極其高明矣故雖舊所  
聞然亦心之所已知者與厚為所已能之意只一般  
溫之敦之亦非著力求加之謂但尋繹使之不忘則

為有以溫其故敦篤使之不失則為有以敦其厚矣  
由是觀之則廣大也高明也皆吾心之所自有故也  
厚也皆吾心之所已得致之極之溫之敦之皆不過  
以存其心使其所固有所已得者無所虧喪而已又  
何可以極高明溫故獨不為存心而為致知乎雙峰  
之意又豈不以中庸乃無過不及而平常之理道則  
有行之意道乎中庸非行而何禮者理之節文非行  
何以崇其禮殊不思中庸與精微皆事物當然之理

非學無以知之盡精微固無可疑道中庸之道章句  
雖不之釋然上文道問學之道既以由字為訓則道  
中庸之道亦但如其訓耳由不必遽以為行之義猶  
曰為小學者不由乎此為大學者不由乎此之由而  
已此所謂由其意蓋曰致其知者不可如知者之過  
愚者之不及而皆由乎中庸也知新為致知固無可  
疑禮雖理之節文然不學以明其理則節文之未謹  
者亦不知其為當如何謹矣將何以崇其禮乎由是

觀之則精微也中庸也皆理之所當然新也禮也亦  
皆理之未得於我者盡之道之知之崇之皆所以求  
知其所當然求得其所未得何莫非致知之謂又何  
可以道中庸崇禮獨不為致知而為行乎雙峰唯不  
思存心之未可為行又不思此五句但以存心為致  
知之本故致此誤耳若夫章句以上四者皆為存心  
之屬下四者皆為致知之屬者蓋上四者皆是已如  
此者常欲保全之便不至於不如此下四者皆是未



如此者亦欲窮究之求其得至於如此詳玩章句之  
旨可見上曰不以自蔽不以自累涵泳已知敦篤已  
能曰自曰已便見得皆是已如此之意此譬如穀之  
已在倉者不須多用得力但須常常照管使倉不至  
破弊穀不至散失毋為雀鼠所耗毋為盜賊所竊而  
已何莫非存心之事乎下曰析理不使差處事不使  
謬日知所未知日謹所未謹曰不使曰所未便可見  
皆是未如此之意曰不使有差謬曰知謹所未知謹

便可見亦欲窮究之求其得至於如此之意此譬如穀之未得入倉者便須著力搬運使先後接續入倉未獲者獲之未收者收之無有顆粒之或棄不為他人之所得必至於倉實而後已何莫非致知之謂乎或疑故是舊所聞乃得之於外者與廣大高明本自如此者不同何乃皆為存心之事曰廣大高明是得於賦予之本然者故是所已知厚是所已能又是得於前日學力之已然者二者雖有不同然既皆為吾

心所有則但皆為存心之事而已況性無內外得於學力之已然者亦不過復其賦予之本然者而已又何不同之有往歲雙峰之說方行學者翕然尊信愚獨疑其不然而辯析之如此數年後四書通刊行其說適與管見有契今併錄其說與諸編不同之見於後以俟明者擇焉

謹按章句存心致知之分固無以加愚竊以為四句上半截皆屬存心已無可疑下半截皆屬致知

則似聖賢之學偏於知而不及行此所以不免諸  
家紛紛之論也意者於下截四者以盡精微知新  
屬知道中庸崇禮屬行如此則上句尊德性依舊  
只是存心道問學却是兼知行為下四句之綱尊  
德性是存心統四句上半截道問學兼知行統四  
句下半截亦與章句無大背馳蓋知所以造其理  
行所以履其事而心則所以具衆理而應萬事者  
也故致知而不先存其心則具衆理之體不立而

無以為造理之本矣力行而不先存其心則應萬  
事之用不行而無以為履事之本矣故能存心則  
不以私意自蔽而後可以盡精微存心則能涵泳  
其所已知而後可以知新此皆存心以致知也存  
心則不以私欲自累而後可以道中庸存心則可  
敦篤其所已能而後可以崇禮此皆存心以力行  
也存心所以為知行之本者固如此若以知行相  
對言之則盡精微與道中庸知新與崇禮又未嘗

不先知而後行也饒雙峰陳定宇惟不察此意故以知行互有先後為說饒氏猶知其不可為訓強說為先行後知之序陳氏并不達雙峰之旨但直以知行先後交互為說行先於知天下寧有是哉今以愚見質諸古訓則程子曰涵養須用敬進學則在致知此以存心為致知之本也孟子言存心養性以事天此以存心為力行之事存心乃能力行孟子蓋亦以存心為力行之本但指其本以示

人耳集註曰存心養性以事天所以履其事也觀所以二字則存心為力行之本者可見矣又按章句於致廣大言私意私意所蔽則有害於知不以私意自蔽則能盡精微而知可致矣於極高明言私欲私欲所累則有害於行不以私欲自累則能道中庸而行之力矣於溫故言已知於敦厚言已知能以知對能而言正與論語學而章或問之言有契何嘗不帶行意但曰已知已能則是心所已得

非求知求能之事則溫之敦之但當屬之存心為  
知行之本耳故已知者溫之則能日知所未知而  
致知之功愈密矣已能者敦之則能日謹所未謹  
而力行之功愈至矣觀其釋道中庸為處事崇禮  
為謹節文二者亦皆帶行意思又可見下截兼知  
行未必不合經註意處至其以知行相對而言之  
複者蓋以上截存心言之則致廣大極高明是以  
得於賦與之本然者言溫故敦厚是以得於前日



學力之已然者言則言之固不容於不復愚於前  
段既及之矣若通下截言之則上截章句故曰已  
知即前日所盡之精微耳

前日所盡之精微今日不謂之已知不可也

厚曰已能即前日所道之中庸耳

前日所道之中庸今日不謂之

已能不  
可也

不然求知能當如何而但就已知已能

者言之耶知新便是故中猶有精微之當盡崇禮  
便是厚中猶有中庸之當道非判然不相入也是  
故自存心以致知者言之則必致廣大而後能盡

精微盡精微譬如讀始讀之書皆爛熟一般溫故則已熟者永不忘之意知新則就故之中又盡得無限精微意思自存心以力行者言之則必極高明而後道中庸道中庸譬如行始行之路無差錯相似敦厚則無差錯者永無差錯且不退轉之謂崇禮則就厚之中更無一時一事不道中庸之意禮是節文節則無太過文則無不及非即中庸而何如此則知行之始終始備而非復也管見區區

姑記於此以俟有道而就正焉

通曰讀此者往往因陳氏謂存心是力行工夫遂疑高明溫故知新殊不知章句但曰存心致知未嘗曰力行致知朱子不曰尊德性所以力行而必曰存心何也大  
學或問取程子十二節即致知之事末後五節所以涵  
養本原之地即存心事也若謂存心便是力行下文有  
曰非存心無以致知謂非力行無以致知可乎道體至  
大心體亦至大尊之則能存此心之大所以能極乎此

道之大恐未說到力行處竊謂存心不過存其心之本  
然者致知是欲推極夫事理之當然者心體本自廣大  
不以私意自蔽即謂之致心體本自高明不以私欲自  
累即謂之極已知者溫之而涵泳之味深已厚者敦之  
而持守之力固此皆存心之本然者也然心之廣大自  
具精微之理不學則於理便易有毫釐之差心之高明  
自有中庸之則不學則於事易有過不及之謬故之中  
有無限新意不學則不能知新雖溫故而不能盡精微

敦厚之外有多少節文不學則不能崇禮雖敦厚亦不能以道中庸中庸是精微之極致究其極則一而已凡此皆推極夫事理之當然者也蓋道體極於至大而無外非淺陋冒濫所能容所以不可不存夫心體之本然者道體入於至小而無間非粗疎學問所能悉所以不可不極夫事理之當然者要之存心不必於中分知與行若致知工夫其中却自兼知行而言或曰書以中庸名自第二章以後提起中庸者凡七皆孔子之言也中

庸之道在知與行子思於此以道中庸偏為問學致知之事何也愚謂首章所言未發之中即所謂德性是也戒慎恐懼即所謂恭敬奉持之意其因孔子言中庸皆已發之中也擇而行之莫先於致知此以道中庸屬問學之事何疑尊德性以下皆有而字則重在下股謂存心不可以不致知末於敦厚崇禮不曰而曰以下以字則重在上股謂非存心無以致知也

按通此說正為破雙峰分知行而發極為精詳可謂

度越諸編但而以字以字分配章句二句之義則未必然耳章句此二句乃通釋五句之旨何嘗專為而字以字分哉非存心無以致知即非尊德性無以道問學之謂存心又不可不致知即尊德性又不可不道問學之謂下四句皆當以此意推之常有問中庸溫故知新與論語所言如何於朱子者朱子答以中庸溫故重主於尊德性而言所謂得其本而未自順也今如通之說則溫故反為輕耶况存心是本子思

豈應前四句皆重下股耶假如子思前四句重下股末一句重上股則章句亦當先說存心不可不致知後說非存心無以致知今章句二句先後如此而通說如彼顯見非經註旨又謂引孔子言中庸皆已發之中恐亦未必並謂此章中庸為已發之中則可謂孔子言中庸皆已發則未可朱子釋篇名中字之義何嘗不兼未發之中言哉子思又何嘗不取夫子所言以名篇哉讀者詳之



發明按章句分極高明以下為兩類每每讀之不能無疑蓋道中庸難屬致知溫故知新一事耳不當分為兩事敦厚崇禮亦是一事觀以字可見尤不當分為兩事意欲云致廣大所以尊德性也盡精微所以道問學也極高明言道問學之事道中庸又言尊德性之事也溫故知新所以道問學也敦厚崇禮所以尊德性也尊德性屬力行道問學屬致知知之與行交勉並進首言尊德性而道問學致廣大而盡精微先行而後知也繼言

極高明而道中庸溫故知新而敦厚崇禮先知而後行也欲盡修德凝道之工夫知行二者不可舉一而廢一故先後交互言之

發明正是蹈襲雙峰之說而小變之以為已有者也通者之言乃其對證之藥惜乎其不之取也且先知後行聖學不易之序發明以為先行後知先知後行先後交互言之吾未見聖賢論為學次序有如此紊亂無定序者饒氏知此說之有所不通也故以為此

皆是先行後知成德之序蓋不得已之遁辭也發明  
祖其故智而不知其意出於此又并失其遁辭之旨  
則將何以為先行後知之說乎饒氏之失愚也辯之  
已詳知後則知此矣惟發明所謂溫故知新而敦厚  
崇禮者乃是刪去二句中庸而字以字却自者而字  
連在二句之交以就其先知後行之說經文一字不  
可移易發明務欲已說之可通乃妄加筆削於其間  
則亦何所不至哉餘於後段究之

發明又曰久蘊此意未敢自決後閱呂崇閣記解有言  
曰溫故知新將以進吾知也敦厚崇禮將以實吾行也  
則已言之矣最後則饒氏說亦以章句為疑但饒氏純  
以致廣大以下皆為道問學之事而溫故知新敦厚崇  
禮仍分為四事亦未安但其分知行則不差云 又引  
饒氏曰溫故知新博之以文也新厚崇禮約之以禮也  
記解乃一時之言倪說乃庸人之見孰若章句之屢  
經改定為不可易耶引彼證此未得為當况章句以

溫故敦厚為存心記解亦但以知新對崇禮分知行而溫故敦厚正不害其自為存心為知行之本也發明若知存心力行之異味則必不為此言矣惜其不知取通之說也

輯釋

士發

謹按此一節胡先生發明章句而未說到力

行處固得朱子之意矣先師則自述所見而以知行交互言之於此似得子思之本意也若以章句存心為力行固不可然中庸本文五句未嘗不可分知與行也何

以言之上文洋洋優優二節其總結之語曰待其人而後行子思既明提出行之一字矣遂結之曰苟不至德至道不凝焉至此五句乃詳言修德凝道之方夫德也者行道而有得於心之謂也必能行道而有得於心斯可以凝聚此道於心但行而非知則為冥行知而不行則為徒知以先後言知固在先以輕重言行又為重故二者必交勉並進然後可以修此德而凝此道耳若果未說到行處則雖知之未能行之是道與我猶二也何

以為修德凝道之寶哉以此章第一節以修德凝道之效而言未有徒知未行而有此效者也先師嘗自謂願為朱子忠臣而不為朱子佞臣即此亦可見矣

觀輯釋先謂胡氏通得朱子意其師得子思本意則是以朱子意為非子思本意也末後引其師忠臣佞臣之說則是謂其師為忠臣胡氏不得辭佞臣之名矣其中間一段議論自中庸本文五句未嘗不可分知與行至未有徒知未行而能有此效之言不為不

是但乃師知行之分恐亦未為得子思本意耳欲得子思本意恐須如通所謂存心不必於中分知與行若致知工夫却自兼行而言之說方為的當政恐朱子所言大綱已得所失者不過下截四者欠說出行字耳然以析理對處事知義理對謹節文雖不說破是先知後行而知行相對之意已隱然寓於其中通之言無以加矣朱子所以不直說為行者政以問學二字可以知言不可以行言耳若發明就上截五



者之中說作力行此則決然不可非惟不識力行亦  
不識存心反自以為忠臣可乎輯釋阿其所好政恐  
未免為乃師之佞臣耳愚請申前管見以明之蓋聖  
學之要有存心有致知有力行存心是涵養本原工  
夫所以為致知力行之本者也中庸開卷便以戒懼  
慎獨為言戒懼所以存天理慎獨所以遏人欲存天  
理固所以存心人欲不遏心可得而存乎二者皆所  
以為知行之本者也故其下十章遂言擇守中庸之

事正致知力行之謂也然則分而言之則曰戒懼慎  
獨專言之則曰尊德性而已所以章句於下四者上  
截既曰不以私意私欲自蔽自累又曰涵泳敦篤其  
所已知己能皆所以遏人欲而存乎天理也何莫非  
存心事乎存心乃所以為知行之本下截四者兼知  
行意已於前段詳之此不再述發明輯釋但知力行  
之不可無而不知存心之尤不可無則知行且無其  
本矣質以首章戒懼慎獨之旨豈為得子思之本意

乎輯釋謂本文五句未嘗不可分知與行也愚亦謂  
下文五句未嘗無存心意也今但說作力行而泯其  
存心之旨可乎朱子欠說出一行字尚不免諸家紛  
紛之疑今知有力行而不知有存心且不知行之不  
可以先於知則是舉末而遺本末知而先行其不可  
也必矣

叢說上節皆存心之屬體認自可見但下截皆致知之  
屬却有兩道字與崇禮皆是行意蓋窮學問之功而欲

道之極中庸之理而欲道之究威儀之則而欲崇之固致知之事與盡精微皆一類也然知之明然後能行之篤又不徒知也則謂盡精微知新皆所以為行之地則與道之崇之又豈非一類耶故章句主於致知而言致知則行在其中其義精矣

此說大概得之然不及通之明白但直以道為行未知果得章句道由也之旨否已於前辯饒說處及之此不再述

輯講謂中庸大抵以三達德為體道之要始焉以入德之序言之則曰知仁勇終焉以成德之序言之則曰仁知勇是以以誠之一字揭於中篇以為一書之樞要而入德成德之界限於此焉分今以前章觀之皆先知後仁而篤之以勇入德之序然也以後章觀之皆先仁後知而勇以終之成德之序然也如博厚高明持載覆幬是已此章意亦猶是致廣大欲其仁如地之無不容載也極高明欲其知如天之無不照臨也故者溫之厚者

薦之又欲其勇如天地之悠久無疆也溫故如天之循環敦厚如地之持重此所謂大德者也盡精微者仁中之知

地道廣大而精密

道中庸者知中之仁

天道高明

而中庸

知新者勇中之知

天道久而常新

崇禮者勇中

之仁

地道質而主文

此所謂小德者也

講義與前共篇

此不過其誤起於以存心為行遂至泛濫支離旁引曲證以張皇文飾其本不可通之說耳本原既差淫詖之辭皆在所不足辯也其以天道地道為說正是

因呂氏天德地德之意而推廣之呂說或問譏其失之愈遠雙峰何為又述之耶先仁後知之失後段辯之

輯講君子者成德之稱學聖人之道而未至乎聖人者也成德之事非君子莫能及尊德性而道問學至敦厚以崇禮此皆先仁後知而勇以終之成德之序然也

此亦原於不知存心不可為行之誤故強援君子成德之稱以合於先仁後知成德之序耳其實先仁後

知即是自誠而明之事所謂性之之德誠者天之道是也惟堯舜性之之德可以當之如湯武身之反之顏子博文約禮便亦只可以為自明而誠先知後仁誠之者人之道耳況君子之為成德亦不過大而未化之事去聖神地位固自有間豈可便以此成德之稱為先仁後知之事乎且既曰問學分明是由教而入者之事遽以為先仁後知實所未喻雙峰亦自知其有所不通也故又以學聖人之道而未至乎聖人



為言學而未至者遽以自誠而明之事歸之則不勉  
不思從容中道不待學而已至其地者又將何以處  
之乎

竊意為學之序皆當先知而後行其所以有先仁  
後知先行後知之序者則以聖人既生而知之則  
不復從事於致知工夫一有當為之事但見其行  
之而已行之而無不當乃見其知之無不明耳雙  
峰謂君子德雖已成當益加學問之工以充之謂

之當加學問即先致其知之謂強說以為先行後知可乎

饒氏又謂章句云此章言人道也愚謂此章言君子德雖已成而當益加學問之工以充之使小德大德各極其至以起下五章之意非對下文為天道人道之分也故自此以下四章皆不及誠至三十一章始以至誠為言又與至聖為對亦非為誠而發

此章以問學為言分明是誠之者之事只可以為人

道故章句以入德之方言之至矣若因君子是成德之稱而說為先仁後知之事則決然不可前辯已詳此不再述惟雙峰以此為先仁後知之事故忌朱子人道之說有妨於已遂謂此章非對上章為天道人道之分又顧本章有問學二字未可遽以為誠者性之之事故又曰君子德雖已誠而益加學問以充之曾謂自誠而明者德無不實而明無不照乃猶有所未充不能無待於學問之功者乎至謂自此以後皆

不及誠為不分天道人道之證此尤不然天道只是自然而然人道只是使然而然自然而然是誠者之事仲尼祖述章及下二章不謂之自然而然不可也使然而然是誠之者之事大哉聖人之道章及下二章不謂之使然而然不可也要當論其理而已何必以有誠字無誠字為泥乎善乎永嘉陳氏之言曰只合逐章體認才不費力處便是天道着力處便是人道此可以正雙峰之誤矣其詳於三十二章之

末言聖希天賢希聖處辯之

詩曰既明且哲以保其身 發明愚謂引詩所以證無  
道默容子思其亦有感於所逢之時而言歟

按語錄明哲是曉天下事理順理而行自是災害不  
及其身今人以邪心讀詩謂明哲是見幾知微先占  
便宜如楊雄說明哲煌煌旁燭無疆遜於不虞以保  
天命便是占便宜說話所以被他這幾句誤然則明  
哲保身亦只是常法若到那舍生取義處又不如如此

論詳味此意正是為預破發明識見而設發明奈何  
既引語錄而又自為此說耶愚竊以為引詩是通證  
上文居上不驕至默足以容數句故結之曰其此之  
謂與今以為但證隱居默容誤矣况烝民之詩為仲  
山甫作山甫乃宣王中興之佐豈但默容者耶

第二十八章 輯釋引陳氏曰愚者無德賤者無位當  
聽上之所為生今世而欲反古哉必及身歎時不可為  
自用自專皆非明哲保身之道承上章末之意而引之

按如此者之此字是通指愚自用賤自尊今反古三者言則裁及身是三者之通戒陳氏之言似欠明潔兼之愚自用政是有位無德而欲作禮樂者亦以為當聽上之所為亦欠分曉但曰承上章末意而引却可備一說

第二十九章章句呂氏三重之說 饒氏謂以議禮制度為重猶之可也考文何重之有徵指文獻而言其重一也尊指位而言其重二也善指德而言其重三也備

是三者以王天下然後寡過夏商無徵孔子不尊時王有徵而未善自君子之道本諸身以下言必如是而後盡善

竊意以此為三重似亦有理可備一說蓋如呂說則寡過在人雖可宛轉說通終是費力如饒說則寡過在王天下者文勢意義頗似皆順觀經文但言其寡過矣乎並無在人之意可見但雙峰考文何重之言失之過當非天子不考文豈可謂之輕耶



知天知人 叢說上文四句下文兩句却只說鬼神聖  
人二者蓋鬼神乃天地氣之靈者鬼神即該天地一句  
而以知天結先聖後聖一揆即後聖該三王一句而以  
知人結

意者天地著鬼神幽幽者難知三王已然後王未然  
未然者難知故二句但從難知者言之爾按此章先  
生嘗謂不謬不悖不是知意無疑無惑正是知意故  
以此結之也二意皆不出叢說所言者但上文六句

而皆只言四句抑有說乎蓋本諸身而未徵諸庶民  
無以驗其德之可以通天下之志與否也徵諸庶民  
而不考諸三王則霸者之民騷戾如也亦豈足為信  
從之正哉故必考諸三王不謬然後身所本民所徵  
皆合乎前聖之成法自然有建天地質鬼神俟後聖  
之必然者矣此所以但以四句言也

以永終譽蚤有譽 發明謂永終譽要其終而言蚤有  
譽由其始而言蚤譽猶易永譽為難又引饒氏曰蚤猶

遽也

竊意未有不如此而蚤有譽當看未有二字正是謂  
必有本諸身以下六事方有永終之譽却不是未能  
有此六者而先有譽也故曰未有蚤即先之意對不  
字而言故饒氏以為猶遽也發明以蚤有譽為始為  
易不知子思之意正是以為無蚤有譽之理奈何反  
以為易為始乎

第三十章仲尼祖述堯舜憲章文武上律天時下襲水

上章句皆兼內外該本末而言也 或問子之所謂兼  
內外該本末而言者何也曰是不可以一事言也姑以  
夫子已行之迹言之則由其書之有得夏時贊周易也  
由其行之有不時不食也迅雷風烈必變也 以至於仕  
止久速皆當其可也而其所以律天時之意可見矣由  
其書之有序禹貢述職方也由其行之有居魯而縫掖  
居宋而章甫也 以至於用舍行藏之所遇而安也而其  
襲水土之意可見矣若因是而推之則古先王之所以

迎日推策頒朔授時而其大至於禪授放伐各以其時者皆律天時之事也其所以體國經野安上全下而其廣至於昆蟲草木各遂其性者皆襲水土之事也使夫子而得邦家也則亦何歉於是哉

或疑經文祖述憲章上律下襲四者章句既曰皆兼內外該本末而或問但言上律下襲二者不及祖述憲章之意抑有說乎蓋目雖有四事不過二堯舜之道文武之法何嘗懸空無所寄寓哉不過即於上律

下襲之中見之堯舜文武所以施之天下國家者何者不是上律下襲之事夫子遠宗近守亦不過在於上律下襲而已觀或問既言夫子上律下襲之實於前又述古先聖王所以上律下襲之義于後則夫子所以遠宗近守者豈在上律下襲之外哉或又疑或問所言夫子上律下襲之實不知當以何者為本為內何者為末為外耶曰事理本不相離精粗物無二致若本自本末自末內自內外自外則理為虛器事

為粗迹精粗皆不相干矣而可乎姑以得夏時贊周易一端言之則以建寅之月為歲首與爻畫象數皆其粗者所謂末與外也至於正之所以當建寅爻畫象數之所以生生不窮則有至理存焉即其精者所謂本與內也推此一端餘可見矣

小德川流大德敦化 饒氏謂小德為體川流其用也大德為體敦化其用也又曰勉齋以大德為體小德為用是要人識得大總腦不當與之較文義

按勉齋雙峰二說相須方盡經註之意蓋勉齋只說大德小德而如此分體用雙峰并說川流敦化則又如此分體用勉齋是相對說雙峰是交互說不可以執一求熟玩經註之旨可見試以性與天道言之則性便是小德便是天道之分便是用天道便是大德便是性之本便是體此勉齋意也又就天道之發育人性之感通處言之則天道固是大德是性之體其發育萬物於穆不已處便是敦化便是用之所在人



性固是小德是天道之用然對情而言則其寂然不動萬理全具處却又是情之體其感而遂通喜怒哀樂各有條理處乃川流之義又是其用之所在此則雙峰之說也其實子思朱子之意則包得二義讀者詳焉可也其詳已於二十六章及之此不再述

叢說中庸分三大節前三節皆以孔子結之第一節自性命之源言之次以大舜顏淵子路三達德為入進之門其後則曰吾弗為之吾弗能已是以孔子折衷之也

第二節言費隱其下歷叙大舜文武周公而次以孔子論政繼羣聖之後也第三節言誠反覆於天道人道得時措之宜垂萬世之法非孔子不可也後二章至聖至誠亦就此章而言其極爾

此說深有助於章句顯見饒氏以哀公問政章為不全是孔子之言且當屬下節無發明所傳一致之意大哉聖人之道以下六章自為一節不可分天道人道者其說不然讀者詳之

自二十七章至三十二章章末章句人道天道之分饒氏皆不以為然而又自曰前三章賢希聖之事後三章聖希天之事

此已於二十七章畧辯之但以賢希聖聖希天為分別却又出不得章句之意賢希聖便是未能真實無妄而欲其真實無妄所謂誠之者人之道是已聖希天便是真實無妄之事誠者天之道是已人道與賢希聖者畢竟皆是使然而然之事天道與聖希天者

畢竟同為自然而然之事但天道人道是中庸本文  
聖希天賢希聖是他書之語以他書解中庸孰若只  
以中庸解中庸之為明而易見又且貫串之為愈乎  
饒氏只因以六章自為一節故忌朱子天道人道之  
分與前諸章連接易至牽動其說故引通書此語變  
易之耳是猶諱其名而呼其字之意也殊不知六章  
雖自為一意自不妨與上六章皆為發明天道人道  
之意兩此意已詳於前更不再述

第三十二章章下章句亦天道也 輯釋引番易李氏

曰饒氏謂天道人道只到至誠無息章住可謂朱子忠臣矣但饒氏謂大哉聖人之道以下六章皆是說小德大德竊意小德大德見於仲尼祖述章朱子謂小德者全體之分大德者萬殊之本若以愚自用章為小德三重章言大德則未見其為全體之分萬殊之本也妄意大哉聖人之道以下皆以至道至德言之蓋中庸前但言君子之道至此始言聖人之道前但言達道達德至

此始言至道至德至德至聖之德也至道至誠之道也大抵修至德乃能凝至道尊德性而道問學修德凝道之大端也以下八者非至於成德之極不止也居上不驕至默容修德凝道之效也此一章乃下五章之綱領二十八章言愚賤者之不能修德凝道而所謂有德無位不敢作禮樂與夫吾從周則皆指仲尼言也二十九章言聖人能修至德凝至道也三十章舉仲尼以為修至德凝至道之標的蓋必至德如夫子而後能凝至道

與天地同其大也三十一章言至聖之德以配天結三  
十二章言至誠之道以達天德結之修德凝道至此無  
以加矣以至聖為至德至誠為至道至聖之德至誠之  
道朱子既顯著之章句矣愚非敢為臆說也況始則  
曰苟不至德至道不凝焉終則曰苟不固聰明聖知達  
天德者其孰能知之脈絡貫通尤為可攷

饒氏天道只到無息章住之說愚已於前辯之  
此不再述但李氏自謂此六章皆說至道至德者似

矣而又謂前但言達德達道然則自十二章至二十章九章何以不說為言達道達德而以為言費隱耶恐此十二章亦只當從朱子天道人道之分未可以忠臣稱饒氏也愚於二十六章章下言之已詳請申前意以明之蓋此十二章亦是自三達德說入費隱上去皆所以明天道人道之難易淺深耳二十七章章首正是自達德說入費隱之交接處其於此言至德凝至道之意正如費隱章言與知與能有所不知



不能之意一般彼章曰知曰能便是上節知仁勇之事此曰至德便是已前仁知勇之德仁知勇之德便是前所謂至誠盡性至誠前知至誠無息之仁知勇耳觀至誠盡性章章句釋天下至誠之義曰謂聖人之德之實天下莫能加也則至德為即指此而言之意可見前十九章主於立本故以達德知仁勇而行達道此十二章主於致用故以至德仁知勇而凝至道達道至道則皆指費隱而言但有淺深耳故必有

仁知勇之至德則能凝洋洋優優之至道而欲有此  
至德於己者則又當以尊德性道問學之功自盡也  
故凡已有此至德者天道也已前之盡性前知無息  
已後之仲尼至聖至誠三章皆是已方修此至德者  
人道也已前之致曲有誠成已成物已後之存心致  
知不倍不驕三意皆是已豈可謂此六章無人道天  
道之分別乎

叢說前章言表此章言裏章句則曰前章言至聖之德

德主積於內者言之也此章言至誠之道道主行於外者言之也蓋聰明睿知之資仁義禮知之德雖見於外實溥博淵泉積之於中者之所發也知化育立大本雖主於中而經綸大經其仁其天其淵者亦自外而見之也前言德推其本而言之後言道致其用而言之蓋亦互相發也

此於語錄表裏之言章句道德之說頗有折衷

第三十三章不愧屋漏 叢說人居屋漏之中自視其

身尚不分明以譬君子不但於人所不知已所獨知之  
地而慎之於已所不知之地亦所當慎

發得已所不知之意分曉愚竊以為首章以隱微並  
言隱是幽暗之中微是細微之事唯幽暗之中有細  
微之事故有所謂獨此處說不愧屋漏則屋漏但是  
幽暗之中未有所謂細微之事故但為已所不知之  
地能不愧於此即戒懼不睹不聞之謂也

中間四節引詩之旨章句

云云

饒氏謂奏假無言之詩

以慎獨之效言也不顯惟德之詩以戒懼之效言也

通謂此兩引詩

素假無言不顯惟德

承上文不動而敬

不言而信兩極言其效也惟其不言亦信所以無言而人自信之有不待賞罰而化者惟其不動亦敬故篤恭不顯其敬而天下自平篤恭而天下平即首章致中和而天地位萬物育也特首章是致其中而後致其和篤恭者已致其和而益致其中也為已之功愈密則德愈深而效愈遠者如此 輯釋亦引通說

按章句於此四節皆以承上文言之則似饒氏前節效驗承前節工夫後節效驗承後節工夫之說疑於兩兩隔越不見章章各自相承之意而通說似乎可取但章句於相在爾室節云則其為已之功益加密矣則是潛伏孔昭之詩為已之功猶未如此之密也於不顯薦恭節云則其德愈深而效愈遠矣則似奏假無言之詩德猶未如此之深效猶未如此之遠也其意若曰有前二節工夫則有後二節效驗工夫已

密慎獨而加密戒懼故效驗已遠奏假靡爭而愈遠

篤恭天下平

惟通以為已之功加密則德愈深而效

愈遠二句為此章對首章而發故以此二節效驗  
皆承不動不言之意而分殊不思奏假靡爭與篤恭  
天下平之效分明一淺一深不動不言同為戒懼之  
事若如此分則不言之效淺不動之效深恐無此理  
況經文先不動後不言通乃倒置其序以為此二節  
相承之次可乎天下固無能慎獨而不能戒懼有靡

爭之效而不能致天下平之理但此章自下學為已  
謹獨之事推而言之以馴致乎篤恭而天下平之盛  
則說工夫自當自踈而密說效驗自當自淺而深雖  
有漸次正不害其為有則俱有也然則雙峰之說似  
乎得章句之旨通者分二節效驗承不言不動之意  
固支離而不可曉若以此章對首章為工夫踈密效  
驗遠近之說如所謂首章致是中而後致和篤恭是  
已致和而益致中之云則是天下真有兩等戒懼慎



獨工夫首章末章互有先後果是二時做工夫先後  
如此不同耶殊不思戒懼只是一樣戒懼慎獨只是  
一樣慎獨特君子無時不戒懼亦無時不慎獨謂先  
戒懼而後慎獨則戒懼之前又未嘗不慎獨慎獨之  
後亦未嘗不戒懼也蓋動即慎獨靜即戒懼動靜無  
端故立言之序互有先後無所不可耳何嘗如通之  
見哉

上天之載章句上天之事 發明云訓載為事未為的

當新定邵氏曰載猶地載神氣之載言上天所載之道  
無聲無臭也亦有味然不如訓載為始為的當上天之  
始即無極而太極之初也何聲之可聞何臭之可見哉  
載之訓事事猶道也不過言天道之妙無聲臭之可  
聽聞耳事豈有所作為之謂哉惟定字以文害辭以  
辭害志故有未的當之疑耳如邵說則天本是道道  
是天之所載也不曰天專言之則道乎如發明之云  
則天道始然而終不然也不幾於道在太極之先之

誤乎識者豈宜無見於此愚奚容贅

管窺中庸終

中庸一篇大槩

續添

按章句自首章至二十章次序已無可議自二十章至三十二章次序則饒氏以來諸儒其說多有變亂章句之序者雖大綱不可改章句之舊若其間節目似亦有可以補章句之所未備

者今存之以備參攷其猶有未備者則僭附愚  
見以足之云其詳已具各章此特其大畧爾有  
道者其幸正之

首章

章句曰楊氏所謂一篇之體要是也其下十章蓋子  
思引夫子之言以終此章之義

右一章是第一大節

第二章

章句曰此下十章皆論中庸以釋首章之義文雖不  
而意實相承也

第三章至第十一章

章句曰子思所引夫子之言以明首章之義者止此  
蓋此篇大旨以知仁勇三達德為入道之門故於篇  
首即以大舜顏淵子路之事明之舜知也顏淵仁也  
子路勇也三者廢其一則無以造道而成德矣餘見  
二十章

右已前十章是第二大節大槩發明知仁勇此  
後九章是一節皆是發明費隱蓋知仁勇是德  
費隱是道德是人所能知能行者道是人所當  
知當行者必有能知能行之德然後可以施於  
當知當行之道故既論知仁勇即以費隱繼之  
此二大節相承之次也

第十二章

章句曰子思之言蓋以申明首章道不可離之意其

下八章雜引孔子之言以明之

第十三章

至

第二十章

十三十四十五章皆言費之小  
十七十八十九章皆言費之大

惟十六章在中間則  
兼費隱包大小而言

章句曰此

二十章

引孔子之言以繼大舜文武周公

之緒明其所傳之一致舉而措之亦猶是耳蓋包費  
隱兼小大以終十二章之意章內語誠始詳而所謂  
誠者實此篇之樞紐也

右已上九章是第三大節皆是發明費隱直至

二十章始以三達德行五達道者為言却正是  
二大節相承之次或疑君子之道費而隱之道  
不是此五達道之道蓋道雖無物不有然君子  
所當知當行至切至要者惟在於五達道而已  
觀於十二章之末既以君子之道造端乎夫婦  
者結之而下章遂以君子之道四為言謂費隱  
之道非即五達道之道可乎章末言天道人道  
蓋為下章說誠明明誠之張本也蓋自此以前



皆是說用工之事

用工以立其本

用工則先知後行以

學者之事為主中間雖有說聖人事處不過亦

以為學者用工之法自此以後多是說成功之

事

成功而致其用

成功則先行後知以聖人之事為主

蓋欲示學者以成功之準的也中間有說學者

事處則依舊先知後行乃是授學者以至此準

的之階梯也至於人道之極則亦與天道無間

觀於言人道者五章章末之言可見矣其詳於

後節言之饒氏分哀公問政章為二章以屬下節者非是其失已於前辯之此不再述

第二十一章誠明明誠

章句曰子思承上章天道人道之意而立言也自此以下十二章皆子思之言以反覆推明此章之意

第二十二章至誠盡性

章句曰言天道也

饒氏曰以誠者之仁言 愚謂此以誠者之仁

發明天道

第二十三章其次致曲

章句曰言人道也

饒氏曰以誠之者之仁言 愚謂此以誠之者

之仁發明人道

第二十四章至誠前知

章句曰言天道也

饒氏曰以誠者之知言 愚謂此以誠者之知

發明天道

第二十五章誠者自成

章句曰言人道也

饒氏曰以誠之者之知言 愚謂此以誠之者

之知發明人道

第二十六章至誠無息

章句曰言天道也

饒氏曰以誠者之勇言 愚謂此以誠者之勇

發明天道

第二十七章大哉聖人之道

章句曰言人道也

愚謂此章兼費之大小而言而隱在費之中是  
以此發明人道

第二十八章愚而好自用

章句曰承上章為下不倍而言亦人道也

愚謂此章專言費之小者

饒氏有此意

而隱在

費之中亦是以此發明人道

第二十九章三重

章句曰承上章居上不驕而言亦人道也

愚謂此章專言費之大者

饒氏有此意

而隱在

費之中亦是以此發明人道

第三十章仲尼祖述憲章

章句曰言天道也

愚謂此章兼費隱大小而言蓋小德大德隱也

川流敦化則費矣小德川流是費隱之小者大德敦化是費隱之大者是以此發明天道又此章小德川流大德敦化是說天地分上言包人物於其中故交互分費隱詳見二十七章後二

章同

第三十一章至聖聰明睿知

章句曰承上章而言小德之川流亦天道也

饒氏曰此章言小德即是費 愚謂言費則隱

在費之中矣亦是以此發明天道又此章小德  
川流是專就聖人分上言故但為費

第三十二章至誠經綸大經

章句曰承上章而言大德之敦化亦天道也此章言  
聖人天道之極致至此而無以加矣

饒氏曰此章言大德即是隱 愚謂雖言隱而  
未始離乎費也經綸大經不可不謂之費至於  
立大本知化育則費之未嘗不本於隱可知蓋



言費則不假言隱而隱在其中上章是以言隱則不可有離乎費此章是也離乎費而言隱則將淪於空寂而非所以為隱矣實此章亦是以此發明天道又此章大德敦化亦是專就聖人分上言故但為隱

右以上十二章是第四大節皆反覆發明天道

人道之旨却包前第二

達德

第三

費隱

二大節

之意於其中亦是自三達德說入費隱上去其

詳已言於前此不再述 抑嘗通三節之意推之則前後皆是自達德說入費隱上去但前二節十九章主於用工而言所謂知大舜仁顏淵

勇

子路

是達德所謂費隱是達道其相承之次

是以達德而行達道學者事也此一節十二章

主於成功而言所謂仁

盡性

知前知

勇無息是

至德所謂費隱是至道其相承之次是以至德而凝至道聖人事也合而言之則達德衆人之

所同具至德聖人之所獨全達道舉其通行者  
言至道要其極致者言具此達德則皆能行此  
達道矣行達道而有得焉而後有以全此至德  
而凝此至道矣誰謂聖本生知非學可至乎若  
又以至聖至誠兩章貫全篇之旨言之則至聖  
之德即達德至德之德但諸章論達德至德處  
皆分知仁勇而各言之則知行猶二也此則會  
衆德於一章而總言之故中庸論德必至於此

章而後為聖之至也至誠之道即達道至道之道但達道猶有待乎人之行至道猶有待乎人之凝則體用猶二也此則道之已行已凝於人者故中庸論道必至於此章而後為誠之至也德為聖之至則知行兩盡而德外無道矣道為誠之至則體用兼全而道外無德矣德外無道道外無德此其所以相為表裏也歟此中庸一書首尾相應之大畧也其詳皆已於前篇論之


更不再述 饒氏以來諸儒皆分大哉聖人之  
道已下六章自為一節而謂此六章皆不言天  
道人道與章句異其失皆已於前言之亦不再  
述

### 第三十三章

章句四子思曰前章極致之言反求其本復自下學  
為已謹獨之事推而言之以馴致乎篤恭而天下平  
之盛又贊其妙至於無聲無臭而後已焉蓋舉一篇

之要而約言之其反覆丁寧示人之意至深切矣學  
者其可不盡心乎

右卒章是第五大節



四書管窺卷八